

Vun driweriver

erscheint auf www.lenauheim.de

monatliche
Erscheinung

Oktober 2020

von Helen Alba

„Stickle“ aus der Vergangenheit ufghob

Am Tach Maria Himmelfahrt 2020 is im Dettaer „Ferch“-Haus e Mini-Museum ereffnet wore. „Stickle“ aus der Vergangenheit were dorte in sogenennti „vier Ecke“ gut ufghob un warte uf je mehr Besucher: Schwowe-, Schul-, Auto- un Radioecke. Alli Ausstellungsgegenständ sin vun de Hausbesitzer, der Familie Margit un Roman Renner, mit vill Liebe un Hingabe gsammelt un ausgestellt gin. An sellem Tach han sich leider nor wenich Intressierti im Museum ingfunn. Doch alli, die sich des kleeni, awer feini Museum anschau wille, kenne dorte vorbei kumme, sie misse sich nor vorher telefonisch (0727013332) anmelle. De Eintritt is frei.

Ausgestellt sin Autos, die schun mehr als 30 Jahr ufm Buckl han: VW Käfer, Saab un Dacia 1410; Meeblsticker (Bett, Stiehl, Tisch), Haushaltsgegenständ, Gscherr, e Schulbank mit Fibel, Federstock, Bixl un Leschgummi; Tonkriech, Wäschrubb, Bilder, Pharregwänder un villes mehr. Es lohnt sich vorbeizukumme!

Fruhstuck un Mittachesse in eem

Mir Schwoweleit ware seit eh un je gewohnt, zeidich morjets ufstehn, fruhstucke un um punkt 12 Uhr zu Mittach esse. Die Zeite ännre sich awer un so ach die Essenszeite un –gewohnheite. Iwerhaupscht an Sunn- oder Feiertäch. Do tun sich die Leit erschter mol richtsich ausschlofe un dernoh ausgiebich esse. Neierdings treffe sich Gruppen zu eem sogenennte „Bransch“ (Fruhstuck un Mittachesse in eem!) Werd Brunch gschrieb. Un so e Brunch hat im September 2020 in Detta, im Ferch-Haus, stattgfunn. Die Organisatore ware Delia Sescu-Barbu, Direktorin vum Verein for Förderung un Entwicklung vum Tourismus im Kreis Temesch, un die Hausbesitzer, Familie Margit un Roman Renner. Die Gäscht sin aus Detta, Temeschwar, Reschitza un sogar Hermannstadt kumm gewenn. Ufgetischt ware regionali Produkte aus eener Umgebung vun nit mehr als 50 Kilometer: Salate, Käs, kalti Platten, gfilltes Kraut un gfillte Paprika, Mamaliga, frisch Griewe, Schweinsbradl un mehrerelei Kuche. Derzu hat mer Kaffee, Wasser un selwer gemachti Säfte trinke kenne. Weil jo die Pandemie- un Viruszeit bestimmti Vorschrifte mit sich gebrung hat, sin alli Regle inghall wore. Un dass jo Abstand bewahrt gin kann, ware ausser Tische, Stiehl un Bänk im Garte ach Decke un Kisse im Gras gelee un han zum „bransche“ ingelad.

Vun wu de „Bransch“ herkommt?

Erschtmols muss kunschtatiert were: Als Brunch bezeichnet mer e Mahlzeit, die aus Fruhstuck un Mittachesse bsteht. Es Wort Brunch kummt ausm Englische un setzt sich zamm aus „breakfast“/Fruhstuck un „lunch“/Mittachesse. Des ganzi fangt am Vormittach geger elf Uhr an un git bis geger 15 Uhr ausgedehnt. Derbei is die Auswahl an Esse groß un verschieden. Es kann anfang were mit Brötchen, Brot (derzu Leckwar, Honich), fortgesetzt mit Worscht, Salami un Käs mit Aijer. Erscht dann kummt die Supp, Bradl mit Salat, Kuche un Kaffee. Wer e Brunch mitmacht, muss owacht gin, wie un wievill er esse tut. Bei so eener reichi Auswahl kann mer jo nor vun allem koschte. Bis zu guterletscht git awer jeder satt!